



增補甘泉縣志

函叁

ル 5
3144
3



ル 5
3144
3

增修甘泉縣志卷之三

甘泉縣知縣吳鄂峙 張宏運 王熙泰 原纂

甘泉縣知縣陳觀國 揚州府教授李保泰 續輯

甘泉縣知縣徐成敷 桂正華 朱公純 增訂

水利志 陂塘附

河港

淮子河在府城東北十二里亦名懷子河直接雷塘下
達淮家河久湮

國朝雍正六年

欽命大臣鄂 部郎程夢瑛 經理水利分遣各員來揚重濬

增修甘泉縣志

卷之三

水利

正 雍

縣志

槐家河在府城東北十五里本槐姓所開故名自陳公塘接雷塘引水至灣頭入運河 雍正縣志

鰍魚口河在邵伯鎮河西西連邵伯湖東通運河

乾隆三年

欽命大臣汪漉德敏經理水利派員重濬

縣案

市河卽城河自府城門外高橋運河口起歷保障河硯池口至南門外二道溝接運河又自便益門弔橋起繞城東北一從新城拱辰門水關至挹江門水關出針橋接運河一從舊城北水關至南水關出響水橋接運河

而界屬甘泉者自高橋河口起至古渡橋中止又自便益門至小東門弔橋中止

明嘉靖間巡鹽御史吳悌同知府劉宗仁開濬市河關水門歲久又淤萬曆間知府吳秀重濬

國朝康熙十三年知府金鎮加濬未幾舊城市河全涸新城市河僅通北門外不與運河相接雍正九年知府陳宏謀詳請將水利案內餘銀興濬部郎程夢瑛派員監督成功十一年知府尹會一復濬深保障河一帶以蓄內河之水不使外洩舟楫農田罔不利焉

雍正縣志

明張憲市河序先王體國經野畫界分疆必擇水陸
 輻輳舟車四達之地以域民蓋以民生日用宮室食
 貨陶冶木石之重力弗易致必資舟車以任重致遠
 從古聖神開物成務竭心思之力創制舟車以為安
 養生民之政此以沒世不忘也廣陵古揚州之域北
 距淮東距海南濱大江實惟要衝之地兩京諸省官
 舟之所經東南朝覲貢道之所入鹽舟之南邁漕米
 之北運謂之江淮都會信矣古稱富庶揚一益二危
 樓九曲朱簾十里二十四橋風月之景尤為東南佳
 麗自古視今百弗一二輿圖風土猶昔今乃若此夫

豈乾坤氣運久漸澆漓者耶憲生也晚然稔聞古老
 咸謂隋唐舊城去北十里其稱繁華甲天下者乃古
 城之域風水完聚而句城上下雷塘迤邐合流脈絡
 通貫舟楫四達民殷物阜冠蓋東南而人才地產隨
 之今改築之城僅取其附近漕河直達之便殊弗諳
 扶輿風水聚散之大勢水從東北而來復從東南而
 去反弓外射而環城水道故址歲遠湮障斷港絕潢
 風水荒落北郭水關閉於俗忌隍池市河不絕如綫
 財力困竭故老興嗟其所由來久矣嘉靖庚子侍御
 疏山吳公簡命清理鹽政兼督河防風清弊絕百廢

具興周咨民瘼閱歷方隅按蹟考圖喟然興歎謂郡城遠北近南下濕不堪風水偏背此吾督理河隍者之責也乃協謀於郡守劉公僉議既諧爰發官帑募民以事畚鍤資其力而濟之食委屬吏分監督之任三農之隙庶民子來開濬之工始自黃金壩自北而西至小市橋轉橋而南開汴隄故址而擴大之直抵北郭爰關水關力排浮議架以水門引邗江九女澗隋隄汴河九曲法海諸水直達市河出南水關復自北而西而南沿郭壕池深闊倍昔滙於關口以達運河至是而通泰鹽船對口以入新河省漕河填擁之

闕免鈔關滯稅之阻公私稱便遐邇騰歡風水旣便文脉亦濬科第人才褒然穎出數百稔之攸鬱駿發於數月之間春水柳陰龜浮魚物蘭漿桂楫百貨流通綠藻青萍田疇灌溉旣庶而富鼓腹含哺憲覲公嘉績聿成而人心大悅直與宋文正范公興化之海隄文忠蘇公錢塘之湖井相望後先功垂百世一也爰紀以序

同上

吳秀市河記邗溝水國也民利舟楫云兩城并峙市河虹亘其延樓櫓而壕則爲舊繞匝市居者納垢積礫湮塞由來久矣粟米絲麻之屬不得不以車代舟

以擔易篙勞費滋甚且譬之一身榮衛不貫必至立
槁用是民昔露積而今懸磬又地邇海徼匪濠何以
設險辛卯十二月不穀視郡事縉紳先生及父老言
大都如此不穀扼腕太息曰噫千年而陵爲谷谷爲
陵者氣數也不百年而水幾爲陸豈非人事乎夫蠹
有胚胎不剔之安能轉害而利也周覽廣諏知河之
北來有高橋若干丈弊民輒壩以漁獵利飲者之
絕其喉民視其河如屈轂之瓠無所用之益憚畚鍤
也命起壩舟達水門外乃下令曰其礎於岸者歲月
湮塞之今濬如其居鄉大夫之高其閭者倡之多藏

之華其楨者從之蓬華圭竇者亦從之踰月砥礪化
而湯湯卽無論設險舟楫地脉諸裨益乃家揚波而
戶挹流如覩神漢利可知矣而新城北面猶然無濠
縉紳先生及父老請所以鑿之如濬舊濠議蓋民一
旦受濬濠之利而遂沾沾覲以舊濠之利利新城也
民見不穀之拮据濬濠而意始事於新非不穀莫以
也不穀惟民利是利獨計鑿濠非若濬之可因居而
役縉宜給於官官無所卒辦時巡鹽御史王公捐贖
緩若干鈔關主事伍公暨運司裴公各以俸佐之亦
獲舉畚鍤焉自西自東數百丈而地阜土疏旋濬旋

湮至癸巳春三月始成功兩水合流欸乃之聲不絕
人人喜其復而悲其晚也於是士大夫請紀其顛末
雅念胼胝以濬鑿茲兩河良苦其曩嘗壩而漁獵利
者見持縛於河有如剗刃於其胸日望不穀之朝解
郡符而暮捧土以壩也其業無如此郡符何托之乎
蠹國課而以青蠅之營營以中也必令惟關而無濠
其民間之寸儲半菽朝夕由舫以進餽其口者悉剝
之以肥其橐始快耶且也詎有容舫之濠而致商賈
峨然之帆相望乎縱濠可舫帆而南北一河將焉逋
之噫何大繆戾不經也此固弊民漁獵利之言也君

子無爲利所餌而使弊民得志哉則河利殆永永矣

同上

柴河在城北三里東通運河西接市河相傳爲舊城南

濠之址

雍正府志

保障河一曰砲山河在府西一里南通古渡橋北抵紅

橋西繞法海寺

同上

城北三里舊有柴河東達官河西接市河而西一望
平原別無濠塹崇禎十年始自柴河口引城東運河
繞西郭又折而西南以接城南二里之寶帶河仍合
於運河延長十六里時又於近河東岸緣壘爲城上

設敵臺以備流寇因名之曰保障 方輿紀要

國朝雍正十一年知府尹會一重濬保障河記

今天子崇尚禹功盡力溝洫自畿甸以及東南悉

詔興水利蓋所以爲民謀者至矣揚州地廣而饒水泉之所爲
滋息也歲壬子制府都御史尹公推

上功德加惠元元疏請濬兩城之市河通舟楫以爲民利奏
可而施畚鍤焉緡給於帑役董於官庶民效子來之誠
不數月而厥功以竟余時適奉

命調守是邦與告成事越一日邦之薦紳先生謂余曰市河
之流暢矣然而引貫有源抑經營未可後也城西保

障一河卽舊所稱砲山河者襟帶蜀岡繞法海以南
通古渡在昔春水柳陰遊船歌吹咽岸塞川而百貨
鼓枻其間田疇資以灌溉此固與隍池相爲表裏誠
得藝其淤澱進以廣深則非惟壯郊原名勝之觀其
攸賴於市河之蓄洩者實大余因切究形勢相度以
諮諸監督水利程公公樂成其美爲遴練幹之王君
華俾襄厥事經費所出則其以俸倡而士紳之好義
者佐焉於是周迴故址擴而疏之更爲鑿其斷港絕
潢使欸乃相聞迤邐以至於平山堂下父老謂以今
視昔滙遠流長泱泱乎巨觀矣方春始和有請栽桃

柳於兩隄衛疏土以供遊目者固亦足以表民物之
殷阜示太平之景象也爰復捐植而不敢以煩吾民
夫體國經野職有常經矧我

皇上

加意閭閻民利是利為吏者惟是奉宣德意區區之役
寧謂足紀述以告將來然而有其舉之莫或廢也正
亦不得不深有望焉耳是為記 雍正府志

國朝程庭保障河詩保障河頭淺淺波玉鈎斜下草成
窠游人那管興亡恨偏唱當年水調歌 山光柳色
共婆娑城角風吹起綠波頻喚榜人移艇子藕花深
處管絃多 若菴集

龍河在府城西北砲山河之前東通運河 雍正縣志

煬帝港在府城西北十五里水逕隋故宮接雷塘近煬
帝墓故名 雍正府志

續志考正河港八條俱見前山川內

湖澗

邵伯湖在府城北四十五里東接艾陵湖西接白茆湖
南通新城湖北接甓社湖自築邵伯埭以後艾陵等湖
則在下河邵伯湖在上河與黃子等湖通連濱湖皆民
田 參府縣志縣案

黃子湖在府城北六十里東通官河即邵伯湖河西至

赤岸湖在黃子湖西 雍正縣志

新城湖在府城西北四十五里東通官河

按新城謝安所築湖以城名也 雍正縣志

白茆湖在府城東北四十五里 雍正縣志

舊有斗門橋官河水涸則引湖水以濟漕運 名勝志

朱家湖在府城東北五十里東通官河西至末口 雍正縣志

按萬歷縣志邵伯黃子赤岸新城白茆朱家

六湖皆在官河上岸水相連接

艾陵湖在府城東北四十五里邵伯鎮之東即下河 雍正

縣志

寰宇記曰合瀆渠東有小渠濶六步五尺東去七里

入艾陵湖今湖在邵伯鎮東西接官河謝安立邵伯

堰即此湖之水也齊建武五年遏艾陵湖水立裘塘

屯今自艾陵湖之北曰封塞湖又北曰淥洋湖淥洋

湖之西曰甕子湖互相通注入於官河 方輿紀要

大石湖在府城東四十五里平寮鄉一名岱石湖一名

棹石湖水通張綱溝 同上

舊志張綱為廣陵太守於東陵村開渠引大石湖水

灌農田民利之呼為張公渠宋元豐中羅適為江都

令復濬大石湖廣袤數百步改名元豐漑田千餘頃
收穫皆倍 雍正府志

葑塞湖在府城東北五十里艾陵鄉北通淶洋湖南通
艾陵湖 雍正縣志

淶洋湖在府城東北六十五里南接艾陵湖東北屬高
郵州 同上

中瀆水自廣陵北出武廣湖東陸陽湖西二湖東西
相直五里水出其間下注樊梁湖舊道東北至博芝
射陽二湖西北出夾耶乃至山陽 水經注
按淶洋湖卽陸陽湖

甕子湖在淶洋之西 同上

按萬歷縣志艾陵大石葑塞淶洋甕子五湖
皆在官河下岸受水者也

採菱港在淶洋湖 雍正府縣志
薔薇港在府城東六十里一名薔薇溝 雍正府志

薔薇溝接高郵永貞港卽昔之薔薇村也 方輿勝覽

張家溝在府城東北四十五里艾陵鄉西通官河北接
艾陵湖 雍正府志

九女澗在府城西北三十里昔傳秦九女墳在澗側故
名 萬歷縣志

增修甘泉縣志 卷之三
花山澗在西門外今淤

文津在府治東

東津在大東門外

續志考正共十七條湖澗一門俱見前山川內

隄壩

隋隄大業元年築

雍正縣志

煬帝築官河隄詔民間植柳一株賞一縑錦帆過處

香聞十里

南部烟花錄

唐白居易隋隄柳詩隋隄柳歲久年深盡衰朽風颯
颯兮雨瀟瀟三株兩株汴河口老枝病葉愁殺人曾

經大業年中春大業年中煬天子種柳成行傍流水
西自黃河東接淮綠影一千三百里大業末年春暮
月柳色如烟絮如雪南幸江都恣佚遊應將此樹蔭
龍舟紫髯郎將護錦纜青娥御女直妝樓海內財力
此時竭舟中歌笑何日休上荒下困勢不久宗社之
危如綴旒煬天子自言歡樂殊無極豈知明年正朔
歸武德煬天子自言福祚垂無窮豈知明年皇子封
鄒公龍舟未入彭城閣義旗已入長安宮蕭牆禍生
事大變晏駕不得歸秦中土墳數尺何處葬吳公臺
下多悲風二百年來汴河路露草冰烟朝復暮後王

何以鑒前王請看隋家亡國樹 長慶集

國朝王阮亭隋隄柳詩邗溝南望是金城更指隋隄百

感生撩亂飛花春自晚淒迷江曲候潮平弩臺雨過

連莎影水殿秋來起雁聲猶為君王鎮憔悴大隄如

雪不勝情 漁洋集

邵伯埭在府城北四十五里一名邵伯堰今邵伯鎮 縣志

晉太元十一年太傅謝安鎮廣陵於城東北二十里

築新城又城北二十里築此以利民田 晉書

續志考正晉書本紀太元十年八月太保謝安薨

資治通鑑以築新城為十年事不應在十一年太傅其贈官也

宋徐鉉邵伯埭下寄高郵陳郎中詩故人相別動經

年候館相逢倍慘然願我飲冰難輟懼感君扶病為

開筵河灣水淺翹秋鷺柳岸風微噪暮蟬欲識酒醒

魂斷處謝公祠畔客亭前 徐常侍集

蘇轍邵伯埭別少游詩濛濛春雨濕邗溝篷底安眠

晝擁裘知有故人家在此速將詩卷洗閒愁 樂城集

秦觀次韻子由邵伯埭見別詩孤篷短榜沂河流無

賴寒侵紫綺裘邵伯埭南春欲盡為公重賦伴牢愁

淮海集

國朝王士徵邵伯舟中詩一望遙天闊茫茫泛夕艤樹

分甃湖水月上楚人家野戍寒蟲亂廻隄古廟斜蕪

城前路近官柳欲棲鴉 漁洋集

平津堰即運河隄 雍正縣志

唐興元中淮南節度使李吉甫居三歲矣奏蠲逋租

數百萬築富人固本二塘溉田且萬頃漕渠庫下不

能居水乃築隄闕以防不足洩有餘名曰平津堰 唐書

二李列傳

運河東西隄在縣界者八十里隄乃宋天禧中因隋隄

之舊增築 河防志

寶公隄在邵伯鎮東南寶公寺右康熙三十八年被水

沖決寺僧募捐續築 府縣志

續志考正已見河防內

陂塘

愛敬陂在縣西五十里魏太守陳登所築 雍正縣志

登在郡時以休暇行城之西二十里濬源為塘溉浸

田疇用獲豐稔民名其陂曰愛敬陂 魏志

唐梁肅揚州牧杜公亞愛敬陂水門記歲在戊辰揚

州牧杜公命新作西門所以通水庸致人利也冬十

土佐古身縣志 卷之三
有二月土木之工告畢從事徵其始末請刻石以爲
記書載濬畝澮距川傳稱爲川者決之使導當開元
以前京江岸於揚子海潮內於邗溝過茱萸灣北至
邵伯堰湯湯渙渙無隘滯之患其後江派南徙波不
及遠河流浸惡日淤月填若歲不雨則鞠爲泥塗舟
楫陸沉困資於牛車積臭含敗人中其氣爲疾爲瘵
長民者時興人徒以事開鑿旣費累鉅萬或妨奪農
功殫財竭力隨導隨塞人不寬息物不滋殖百有餘
年矣貞元初公由秋官之貳出鎮茲土旣下車乃驗
圖考地謀新革故相川源度水勢自江東而西循蜀

岡之右得其浸曰句城塘又得其浸曰愛敬陂方圓
百里支輔四集盈而不流決而可注圖以上聞帝用
嘉允乃召工徒修利舊防節以斗門灑爲長源直截
城隅以灌河渠水無羨溢道不迴迂於是變濁爲清
激淺爲深潔清澹澄可灌可鑿然後漕輓以興商旅
以通自北自南泰然歡康其夾隄之田旱暵得其漑
霖潦得其歸化磽薄爲膏腴者不知幾千萬畝野人
誦曰膾膾原田自今以始歲其豐年都人誦曰沔彼
流水我邦是紀鍾美不知嚮非我公有先物之知移
俗之才則曷能運可大之謀蠲累世之弊繇旬朔之

勞致無疆之逸宜乎人之咏嘆也如此按陂塘本魏廣陵守陳登所設時人愛其功而敬其事故以名之謝文靖成堰又以召公之德為稱有魏以還五百餘載不朽之績及公而三皆在斯邦不其盛歟水門之作將以重成功示長利非登臨游宴之為嬉後之人抑可以知矣 文苑英華

雷塘在府城西北十五里一名雷陂上塘長廣六里餘下塘長廣七里 雍正府志

雷陂有臺高二丈吳王濞之釣臺也 西征記
有大雷小雷之宮 寰宇記

江都王建遊雷陂使郎二人乘小舟入波中船覆兩郎溺攀船乍見乍沒建臨觀大笑 漢書易王非傳

雷塘耕者往往得釵釧蓋煬帝平日常遊之處 宋王象記

見雍正縣志
雷塘煬帝葬處 家記

續志考正又見後冢墓

唐開元中杜佑以尚書右丞出為淮南節度使決雷陂以廣灌溉斥海濱棄地為田積米至五十萬斛列營三十區士馬整飭四鄰畏之 唐書本傳

唐羅隱雷陂詩入郭登橋出郭船紅樓日日柳年年

君王忍把平陳業只換雷塘數頃田

羅昭諫集

明李之儀雷塘詩鞭長不能及馬腹有限生涯時苦
促空使後人悲後人雷塘春草年年綠誰知秀色若
可餐風光付與初凭肩力殫四海歡未已眉黛一螺
當幾錢君不見黃金棟梁回首蠹漠漠胡沙青塚暮
三絃欲斷空自知千金漫買長門賦膏油續盡天須
曉后土餘壘可長保就令並蒂永不分也應終恨雷

塘草

姑溪集

劉弇雷塘詩般遊截長淮聞自隋天子運丁大業末
役跨遼東始洶湧溝濁河赤血洗千里江都天東南

歲閱翠華指錦帆抹非烟疊鼓逢逢起紫幟朱絲絡
百萬羅衛士璇房集彩女灼灼豔芳李虞公正逢惡
何稠甘沒齒一從水調奏便識還聲已浪傳遭箇春
不悟羊無尾雷塘一掬土僅足掩冠履行人爲傷心
清淚墮如水池荒九曲春尙想迷樓倚落日注蕪城
牛羊下坡觜

雲龍先生集

元蘇大年雷塘詩雷塘春雨綠波濃古冢寒烟蔓草
空斜日欲沉山色近行人無處問行宮 吳公臺下
雷塘路錦纜牙檣行樂處當年玉樹後庭花夢裏相
逢惜春暮君不見東家北舍人未歸落花滿地蝴蝶

飛

明胡儼雷塘詩吳公臺下是雷塘望斷春山碧草長

却笑相逢追往事樽前猶說舞腰傷煬帝問張麗華事見大業拾遺

記頤菴文集

潘之恒伏日同友人雷塘觀荷詩塘發白花以水漲不得透出波面

炎天何處問冰壺火裏蓮花望不孤妝出縞衣光四

照操來寒玉倚三珠風香冉冉輕頻舉波翠田田弱

易扶祇少吳歌催放艇舊遊曾憶曲阿湖如江草

王鐸雷塘詩維揚烟雨放輕舸土蝕雷塘望不遙漁

子偶來經破塚玉人無復弄瑤簫霜飛隋苑干門柳

寢冷枚乘八月濤
惘悵繁華回瞬事
月虛澆酒過江

阜擬山園集

國朝王士禛雷塘詩寶城北是上雷塘細草青青古墓

荒莫笑錦帆隋煬帝李花楊葉兩茫茫考功集

彭孫遜雷塘詩楊柳行宮沐水秋如雲殿脚下龍舟

可憐䟽鑿三千里占得雷塘一曲流羨門集

顧九錫過雷塘詩草色波光幾變遷一湖春水化秋

田野人不識閒愁緒樂得耕雲與耨烟 渺渺村流

好放船綠蘋紅蓼水中牽滄桑亦是尋常事阡陌河

妨復作川古塘俱墾作田矣 江春草堂近稿

史順雷塘有感時早饑民載道詩賣花備徧古雷塘沙走長

岡接上方災歲不堪多鵠面人心到底半羊腸可憐

血汗肥青草尙有金鞍繫白楊莫道傷心緣觸目一

錢久矣守空囊

史申義雷塘詩隋苑歌鐘地秋來草尙青三千江雁

影常繞郡西亭蕪城集漢寢秦陵化冷烟阿廢殿脚

勝遊仙可知夢是江都好另占雷塘數畝田過江二集

小新塘在上雷塘之東北水注上雷塘轉注下塘由淮

子河東入漕長廣二里餘雍正縣志宋紹定二年春三月賊李全圍揚州趙范趙葵悉精

銳數千而西取官軍素爲賊所易者張其旗幟以易

之全望見喜范等麾兵益進諸軍爭奮賊始疑非前

日軍欲走入城李虎軍已塞其甕門全窘走新塘陷

淖中不能自拔宋史

新塘在城外紹定間以張燈之夕敗逆賊李全於此

露布有云奮幟麾軍開關延客實精兵於堡塞蹙逆

賊於新塘方輿勝覽

句城塘在府城西三十五里水由烏塔溝東流入漕長

廣十八里其半屬儀徵雍正縣志唐貞觀中李襲譽爲揚州大都督府長史引雷陂水

築句城塘溉田八百頃以盡地利

唐書本傳

宋晁无咎揚州雜咏詩雷陂新作麥田荒曾說風興
沒兩郎誰似當年李刺史春波還引句城塘

按以上四塘與儀邑之陳公塘號為五塘干

餘年灌溉為利明中葉被豪強侵占遂作民

田互見水利

鴛鴦塘在府城北四十里萬曆志云塘與小新二雷積
水當句城之灌後為人侵占莫知其處

雍正縣志

今案北湖小志云今城北黃珏橋之西四里有地
名鴛鴦塘在城北四十里

國朝宗元鼎詩鴛鴦塘上水秋雨浴鴛鴦博得采菱女

朝朝弄畫舫

柳塘在舊隋宮

新舊府縣志

鴨塘在府治西

同上

上下雷塘自有宋以後日就堙廢

方輿紀要

國朝時加修復今由淮子河引流濟運

五塘之設以蜀岡西山一帶土地高亢水易走下故
設塘以收之漕河有水則蓄之灌田漕河無水則洩
之濟運故先正王端毅公每每建議舉復夫何近年
閘礎圯廢水不能蓄句城一塘又為權門私佔作田

竟不能復矣

嘉靖江都志

明盛儀五塘定議畧曰江都縣有上下雷塘小新塘
句城塘儀徵縣有陳公塘今之所謂五塘也自漢時
有雷陂釣臺陂卽塘至獻帝建安四年下邳陳登爲
廣陵太守素有威名凡淮揚之塘堰皆其經理考其
地勢西高東下自壽而來不止一重水有蓄積高卑
皆利其在揚也五塘在上流漕隄在其中捍海堰則
其下也晉隋唐宋均關漕農之重故盡心焉明漕艘
鹽筴軍屯民田咸資其利故以其事屬之平江伯而
平江集古人之大成要之自登始也唐貞觀十八年

揚州大都督長史李襲譽引雷陂水又築句城塘以
溉田八百頃有愛敬陂水門開元初杜佑爲淮南節
度使決雷陂以廣灌溉斥海濱棄地爲良田積至十
餘萬頃貞元四年節度使杜亞自蜀岡之右引陂水
趨城隅以通漕運溉夾陂田長慶二年鹽鐵使王播
自閶門外古七里港引陂渠注官河以便漕運此唐
人之用塘見於唐書者如此也宋熙寧九年劉瑾言
陳公等塘可興置宣和二年以真揚等州運河淺澀
委陳伯亨措置又漕臣錢冲之言真州之東二十里
有陳公塘週迴百里三面倚山爲岸雖廢壞旣久見

有古來基址可以復築靖康時詔淮南運使陳邁引
句城陳公兩塘達於河渠此宋人之用塘見於宋史
者如此也元人海運疏於漕河然至元十八年猶造
閘於上雷塘者蓋漕河非塘水則南北不通故也洪
武八年開平王北征軍需器械舡至灣頭河淺不能
前進奏開四塘下水三尺五寸官河增水二尺六寸
一時得濟十四年旱解京御鹽船至灣頭淺攔開塘
放水船始得行是時塘務爲兩淮運司專管永樂二
年平江伯陳瑄總理漕河全資塘水濟運十五年欽
取皇木時值淺阻亦開塘下水以濟之時設立塘長

塘夫常川看守塘內積水常八九尺非遇至旱運河
淺澀不敢擅放宣德十年奏改五塘屬府專修成化
四年侍郎王恕奏發帑銀於上下雷塘各築石閘一
座水碓二座於句城陳公二塘各增築隄岸石閘一
座水碓二座皆以瀦水旱則由烏塔溝放水南流入
運河接濟也正德十六年大旱四塘圯廢水利不修
運舟淺擱嘉靖十三年知府侯秩建議重修句城塘
漕撫臧鳳爲發帑僉夫並行修治大閘一座減水閘
二座十八年運河水涸管河郎中畢鸞白漕撫周金
總河郭持平巡鹽御史焦連下知府劉宗仁肩其事

以屬之江都儀徵兩縣各理其役所修上下雷塘小
新塘陳公塘東塘柳塘橫塘鴨塘凡江儀之塘一十
有三今之所修蓋九而又爲昭佑祠官亭三間鋪舍
五座責令塘長率夫晝夜防守不時加葺焉不意是
後有倚勢占塘者將塘閘之石毀拆移徙以致時水
暴至不能節制徑入高寶山陽諸湖溢決隄岸東方
之州縣盡沒而灣頭以南河道淺涸運舟阻滯濬亦
不通矣

雍正縣志

銳意求復反覆行勘查得小新塘與上下雷塘相接
西去揚州郡城十餘里水由淮子河入漕河句城塘
西去揚郡幾三十里水徑奔儀徵由響水閘出江四
塘皆隸江都縣唐長史李襲譽所築也陳公塘隸儀
徵縣其水亦奔響水閘出江漢廣陵太守陳登所築
也句塘陳公二塘地形高亢水俱無源惟藉雨積小
新上下雷三塘受觀音閣後上方寺後并本地高田
所下之水局面窄小蓄水無多漢唐時築塘積水不
過爲漑田之計非資運也今若慮漕渠淺涸借此水
濟之則不宜築塘以障其流縱有閘座宣洩無幾且

冬春運河水淺彼先涸矣若慮湖水漲漫借此塘障之則諸水皆從揚儀徑奔出江與諸湖了無干涉也如欲復前人之故業蓄水以溉高亢之田於民未必無益但民間承佃爲田輸價不貲歲納之課又不貲必須盡行償貸築隄建閘費尤不貲矧田高之民欲積田窪之民欲洩築隄建閘之後盜決者多必須添設官夫防守種種勞費難於措辦此馴謂其尙可緩也

河防一覽

張令君甯五塘議畧余每詢士大夫及濱塘父老有主復者謂塘之復有五利焉一曰溉田揚之西北土

高而脉瘠稍稍亢暘則禾焦卷築塘蓄水則魃不爲虐利一一曰濟運揚當南北咽喉江南糧運數千艘渡揚子而北一遇水淺則舟澀不行若復塘蓄水縱或淺澀猶可藉灌注以成飛輓利二一曰形勢五塘岡阜蜿蜒高可以眺遠而甌窶又可以伏奇昔趙葵之破李全高駢之禦黃巢皆此地也塘復設有不虞必不敢西向而窺我右臂利三一曰疏漕淮水由漕南下至淮子河口遇五塘之水橫遏爲敵勢必壅激逆走邵伯諸湖湖隄漲決在所不免惟塘復水蓄則淮順流而下湖腹常枵隄不復決矣利四一曰風氣

五塘紆迴于蜀岡之麓營衛相附脉絡相通塘復則
葆靈毓秀必有豪雋挺生其間利五有此五利故曰
復之便其主不復者曰塘之復不復可不可余不敢
知第就子之五利言似皆耳食爾且以句城一塘膏
壤九千六百畝四圍皆山起高可二里許止東南一
蹊可通烏塔溝入官河且中無宿水可蓄惟俟時雨
暴集耳夫雨多則田已先潤何藉於塘雨缺塘亦焦
釜民田曷賴焉卽有可蓄亦不過灌烏塔兩岸耳其
餘固不能以長綆汲而上也以溝岸之田灌溉無幾
而先沒九千六百畝膏沃之產孰爲勝算乎上雷下

雷大抵若此惟小新一塘差可蓄水蓋此塘寬廣僅
二百畝身處其高有婆羅墩之水汨汨不絕穿中而
過倘設一減水閘少蓄多洩可以灌數千畝餘故不
敢概論也其曰濟運者則尤不達時務之論矣蓋昔
之時患在水少今之時患在水多卽二十四年一歲
中閘涇河開子嬰河開金灣惟恐洩水之不速而又
何假於塘耶卽昔者諸大夫建議甚悉然後先不同
時故不得以膠柱也至濟運之說更不可曉蓋漕艘
之行始於正月終於三月五塘卽有積水一決卽潰
潰卽竭安能潺潺三月耶其曰形勢又不可知夫山

川設險有國之利孰不賴之但揚南襟長江北枕三湖憑陵阻險海內要害何待藉口於李全黃巢之已事耶至疏漕之說益為無稽夫淮子河去邵伯四十里而遙亦安能遠壅之而北使其潰隄敗岸耶且淮為四瀆之一使塘水果能與敵是為巨浸又安能築隄斷流使橫過而不得出耶為此說者益且自相矛盾况洹灣即金灣之決非塘復之年乎風氣之論乃形家言余所未習不敢緩頰但此塘每歲國租二百金昔之歲曾權民佃價二千租不可已則必撤派於不塘之民佃不能償則又負累乎棄業之眾夫奪民之

田而棄之又竭民之力而為之捐已成之業為不可常之功故曰不復便余聞之逡巡以謝諸大夫父老其所議復不復不可各據所見並有良畫余不能去取其間也姑存之以俟有識者萬歷府志以上原志
小新塘東西濶一百丈南北長一百七十丈其水注上雷塘轉入下雷塘由槐子湖東流入官河舊設上塘塘長一名夫四十名小新塘并下塘塘長一名夫四十名

溝洫之為利於民也通舟楫備旱潦由來久矣甘泉境內以邵伯湖為大關係河防不僅水利而已

其自邵伯湖以西如淮子赤岸諸河以及黃珏公道等橋皆密邇邵湖水流分導足資灌溉然無隄防圩岸遇湖水漲泛未免漫溢迤西則連岡疊壠俗呼爲山田閒存塘壩遺跡淤淺不供容蓄豈能挽湖水逆上旣無水源夏間數日不雨卽懼焦枯舊志載五塘議略原爲西北境諸田籌畫永久陳公塘半入儀徵塘盡成田其租久登賦冊在萬厯江都志中已稱不可復况閱今又踰二百餘年故復塘之說雖美而難行相土穀之宜審節宣之用消息隨時難以預定若邵伯湖隄以東勢居下流

艾陵石羊青蕩恒子諸水縈紆盤滙猝遇隄口潰決彌望汪洋河田皆成一片亢旱過甚卽便乾涸其深本不及尋丈也平時涓流曲港迴繞農田漁舫薪艘往來不絕桔槔利賴無方全恃邵隄爲之保障故權甘邑水利者西北與東南異勢今撮其大概著之俗稱易曉不多徵故實也

邵伯鎮運河西岸

閻家套受朱家湖及王家莊新河之水

胥家莊受朱家湖及王家莊新河之水有溝一道自

王莊新河西岸至胥莊止

梅家莊受朱家湖及王家莊新河之水有溝一道自

王莊新河西岸至梅莊止

葛家莊受董家湖及尤家窪新河之水有溝一道自

尤家窪新河西岸至葛莊止

謝家墳受董家湖及尤家窪新河之水有溝一道自

尤家窪新河西岸起至謝家田止

錢家莊受董家湖及新河之水有溝一道自尤家窪

新河西岸起至錢莊止

卜家嘴受董家湖及尤家窪新河之水有東西二溝

自尤家窪新河西岸起至卜家田止

以上諸溝長不過二百丈寬深不過四五尺每
年引水農戶合力挑浚

邵伯鎮南鄉支河

毛家塢受南塘之水舊有支河自南塘起至九家田

止

閔家橋亦受南塘之水舊有支河自南塘起至閔家

田止

黃泥嘴受艾陵青蕩湖之水舊有支河自青蕩至溪

子河止

黃花嶺受艾陵湖水舊有溪子河自黃泥嘴支河至

丁溪大河止

戚家汶受青蕩湖水舊有支河自延壽寺起至溪子河止

高彭橋受青蕩湖水舊有支河自青蕩湖起至孔家涵止

以上諸河長者至數千丈惟閔家橋僅及百丈寬或逾三四丈深亦至丈餘俱農戶按田合力

挑浚

邵伯東北鄉圩圍

延壽寺鄉受青蕩湖水舊有圩岸七

五 黃花嶺鄉楊家莊受艾陵青蕩湖水舊有圩岸四十五

真武廟鄉受艾陵湖水舊有圩岸二十六

顧家鄉永安鎮受淶洋恆子湖水舊有圩岸八十二

戚墅廟受淶洋恆子湖水舊有圩岸六

沿河十莊受淶洋恆子湖水舊有圩岸十八

溝洫導水宜于深廣圩岸禦水利在高厚田既

處窪下各隨村落人戶多少四面築圍使外水

不得內侵遇霖雨積為內水又導之使出誠鄉

田同井之善規也隨時培補工費不少每年亦

由農戶自行按田起工

以上續志

官河上岸六湖考

按甘棠小志云焦里堂循六湖記分析湖界最明畫記曰甘泉之湖在官河上岸者六曰邵伯湖曰黃子湖曰赤岸湖曰朱家湖曰白茆湖曰新城湖今里人以在南者爲朱家湖在北者爲黃子湖在南北兩湖之間者曰邵伯湖以黃子湖中高阜爲赤岸湖問白茆新城之名莫有能舉者矣舊志謂赤岸湖在黃子湖西然則近官河而在九頃頭以東者爲黃子湖其九頃頭以西爲赤岸湖統名之爲黃子湖耳高阜也

而湖云乎哉舊志云黃珏橋在黃子湖南白茆湖北然則白茆湖在黃珏橋南矣黃珏橋至鰍魚口十五里紅廟半之今呼紅廟以東爲朱家湖然則紅廟以西爲白茆湖矣今按其地自北而南有劉家嘴橫亘水中其南有李家嘴自西南指於東北其東有老鸛嘴自東南指於西北三嘴相湊界爲三湖由劉家嘴而西爲白茆湖由李家嘴而南爲新城湖故舊志云邵伯湖西接白茆南連新城也晉書言謝安出鎮廣陵之步邱築壘曰新城又築埭於城北後人追思之名爲邵伯埭以新城名湖必其地當新城以邵伯名

湖必其地當邵伯埭邵伯湖在邵伯鎮北十餘里而邵伯鎮恰當新城湖然則邵伯鎮晉之新城古之步邱也邵伯湖側古邵伯埭所在也明陸弼江都志云浮城岡在城北二十八里豐樂鄉新城湖中高二丈周四十餘丈舊有新城基余詢之里人無浮城岡有蕪城墩俗名蒲扇墩在東西灣離邵伯鎮六七里余特泛舟至其地岡上有廟曰文峯禪院登而望之去湖甚遠弼之所指恐非謂此其所謂新城基在湖中者果何地歟舊圖邵伯湖之南有董家湖規其所在蓋卽白茆新城朱家三湖今劉家嘴以西有董家嘴

其所當之湖卽白茆湖之東然則所稱董家湖者將謂是耶而志書又謂白茆湖有斗門橋官河水涸引湖水以濟運是又通朱家湖爲白茆矣今定之白茆湖在黃珏橋之東南其東爲朱家湖朱家湖之南爲新城湖朱家湖之北越湯家泮爲邵伯湖邵伯湖繞東莊嘴而北東抵露筋祠爲黃子湖黃子湖之西至公道橋渡口爲赤岸湖是爲甘泉上河六湖

官河下岸五湖考

按甘棠小志云曰淶洋水經注作陸陽云中瀆水自廣陵北出武廣湖東陸陽湖西水出其閒下注樊良

湖按武廣湖卽今武安湖陸陽湖卽今淶洋湖也唐
張薦答權載之書云寶應中相國文被褐營道寓居
陸陽謂權載之寓居陸陽湖也府志於甘泉縣下云
淶洋湖在府城東北六十五里艾陵鄉西南接艾陵
湖東北半屬高郵又於高郵州下云淶洋湖在州南
三十里公田村通小涇溝邵伯汎圖作小金溝西南接艾陵湖
半屬甘泉甘泉高郵蓋以湖心爲界又按淶洋艾陵
兩湖之間尙有苻絲湖詳見下文較兩湖差小故志於說
淶洋湖時略之又詳白旆賦言十四湖皆在木蘭
曰葑塞今苻絲湖也江運廳冊甘泉續志俱作恆子

按雍正嘉慶府志并言葑塞湖在城東北五十里艾
陵鄉北通淶洋湖南接艾陵湖是葑塞湖當在淶洋
之南艾陵之北今北通淶洋南接艾陵在兩湖閒者
爲苻絲湖別無葑塞湖又嘉慶志於志河渠言昭關
埧下支河入苻絲湖北入淶洋湖又南二閘三閘引
河入苻絲湖又南毛家橋閘家橋支河匯入南塘歸
艾陵湖亦敘苻絲於淶洋之南艾陵之北府志於山
川志葑塞不志苻絲於河渠志苻絲不志葑塞知葑
塞湖卽苻絲湖也劉瞻衡同字言苻絲湖草青葱一
色方蒂白花清芬襲人梅蘊生植之以爲白蘋瞻衡

又言苻絲湖西面沿河上五莊附錄

國朝郭元鈺葑塞湖牛鳴雙村詩石架瓜籬白竹門桔槔
聲歇打場喧老農八十今閒得捕蝨殘陽倚廢垣曉
風如箭宿雲屯白樹溪橋紅葉邨人事不來書卷合
一樓寒雨看秋原年年塵蹟殫天涯柳縷成邨稻沒
車爲把閒廳傲閒客秋來賺種滿園花
日艾陵江都陸志云艾陵在城東北四十五里邵伯
鎮之東太平寰宇記言合瀆渠東有小渠闊六步五
尺東去七里入艾陵湖阮昇之記云齊高帝建武五
年過艾陵湖水立裘塘屯按昇之紀年有誤府志言

齊高帝紀號建元至四年而止建武乃明帝年號亦
無五年是也劉瞻衡言艾陵湖北苻絲湖南地南北
約五里東西約十五里皆屬下橋鄉又按說艾陵湖
者皆云東西長若干里趙輯五增瑞言自楊家莊南
三里入湖沿右岸行船首皆西南非直西也附錄

國朝朱冕艾陵湖鷗波草堂詩落盡紅衣水拍天草堂人
坐白鷗前攤錢遠市旋沽酒買米比鄰亦放船結納
是君兄弟好談諧容我性情偏山杯不惜勞相勸明
日枯查泛冷煙

日甕子按雍正嘉慶兩府志江都陸志甘泉吳志均

言甕子湖在淶洋湖西今淶洋湖之西惟運河分洩
 入湖有火姚閘等引河府志高郵火姚閘水自淶洋湖濱西抵運隄實無甕子湖蹟惟江運廳圖越運河而西有甕家營或即邵伯鎮北未開越河官河以前為斯湖舊地未知是否

曰大石太平寰宇記作岱石云江都茱萸溝在縣東北十里從合瀆渠東過茱萸埭七十里至岱石湖又西四里對張綱溝入海陵界府志言大石湖在城東北四十五里平遼鄉江都陸志作平遼鄉舊傳湖有石依約見水中亦曰岱石湖又曰棹石湖通張綱溝漢廣陵太

守張綱於揚之東陵邨開渠引大石湖水溉農田民利之呼為張公渠宋元豐中羅適為江都令復濬大石湖廣袤數百步改名元豐溉田千餘頃收皆倍按大石湖舊蹟蓋在邵伯境南接江都縣界府志大石湖張綱溝張綱鎮皆列江都雍正志言張綱鎮在城東三十里鎮東北二里即古大石湖湖今為平壤是也湖則已湮而漢之張宋之羅兩公政蹟固自可紀今甕子大石兩湖湮廢祇存其三府志於志山川並列甕子大石存故蹟也於河渠祇敘淶洋苻絲艾陵三湖斯為紀實三湖之委皆曲折赴海

北湖水道考

邑境有北湖東束於運隄西受西山諸水北受高郵湖水方三十里而灘隈隴阜錯落其中若爪若角若木之交枝非生長其閒往往迷其棹焉自邵伯鎮之北五里由官河達於湖曰鰍魚口由鰍魚口而南湖水過老鶴嘴又西新河口之水入焉又西過許家廠又西嚴家淘之水入焉又西爲薄劉家嘴又西爲楊家渡釣魚臺之水入焉新橋之小水亦入焉又西北過李家嘴歷孫家嘴有錐淘又西過陸家嘴開元寺在其南謝家橋之水入焉又西過沈家嘴季家嘴率

黃珏橋隄而北至睦家嘴澗陳埧之水由橋下入焉湖水繞鎮而北半里過裔家莊與季家嘴對湖相望里許又東半里至屠家嘴高家橋之小水入焉少東爲東嶽廟又東爲竇家嘴又東爲戴家窪東南爲董家嘴與沈家嘴南北相對其東有大隈互於湖爲劉家嘴與李家嘴南北相望若門戶東則爲朱家湖湖水過劉家嘴而北彫胡淘之水入焉湖水又東北過火家洪畢家淘之水入焉淘側有紅廟紅廟之東北有地藏菴蓮花寺在其西北又北折其水如帶岸形若月爲湯家泮是地不生鼃相傳有術士過而禁之

也由湯家泮折而西有郝家樓又西爲蔣家灘又西過馬家嘴又西繞解家嘴龍灣洶之水入焉又北過崔家嘴又東北過南田家嘴板橋之水入焉又東北爲北田家嘴又東北過土城口汪家洶之水來會又東北梁家巷之水入焉又北爲東莊嘴由東莊而北爲黃子湖由東莊而南爲邵伯湖龍灣洶之口有大小兩張家墩墩北當田家嘴東有灘長三四里作三角形在湖中爲管家尖管家尖之西北當汪家洶有老屋基基上鋪瓴甃又稱李家莊河淮未合之先是爲陸地莊宅之形尙可驗矣昔時管家尖種藕夏月

花開爲湖中大觀乾隆四十年大旱饑民掘食之盡因改爲稻田然在湖心稍溢則沒耳湖水繞東莊嘴而西過郭莊又西北有水如帶其北灘長五六里爲九頃頭其南有大帝寺今圯又西少南燒香港之水入焉又西過南王墩墩南有治平寺寺南爲梁家巷有八角井傳爲唐時故蹟不可考少西大洶之水入焉湖水由大洶而西過周家嘴又西小洶之水入焉又西過王家嘴池而南一灘銳而西出爲蕎麥尖又西廟灣之水入焉湖水西過廟灣口至馬家嘴有小水自秦家酒店來入焉又西爲張田家嘴又南有小

水界之又南爲韋家嘴又南界以小水其西南有避風菴自避風菴渡而北抵九龍岡公道橋之鎮在焉先是有湖口橋長半里橋久廢故改爲渡湖水繞鎮而東過審東嘴又東北過陳家花園歐陽墩在其北又東至卜倉倉前有水如帶其東南爲審灘審灘與張田家嘴相對其東卽黃子湖波濤壯矣由審灘而東北過趙家嘴又西北爲陳家淘淘水抵雙塘東淘水又北過唐家嘴三官殿之水入焉淘水又東過珠湖草堂又東爲倪家嘴有小水在嘴中淘水至倪家嘴會於湖湖水北過倪家嘴金家灣之水入焉又東

北過顏家嘴與九頃頭相對爲門戶其西爲赤岸湖其東爲黃子湖傲姑寺在其北湖水由傲姑寺而東有沙家尖長三四里橫互而東湖水繞沙家尖而西北橋頭之水入焉又北潘家埧之水入焉又東北繞林家嘴有淘界其北又西過華家嘴又西過宰家灘司徒廟在其南又西南過盛家嘴其西有柏家渡又南過王莊莊西有眞武廟王德橋之水入焉其西爲胡家渡其南爲西湖嘴嘴之西南有小張家渡又南紅蓮埧之水入焉又西北董家橋之水入焉又北李家橋之水入焉又北至徐家埧蜻蜓橋之水入焉又

北為張家渡渡口有普渡菴其北屬高郵自柏家渡至小張家渡統曰野牛灣又曰野溝灣鰍魚口之東為河隄隄以西皆湖有相墩在其北水中墩上有近湖草堂邵伯相氏之別業也墩北為盧家嘴其西有馬家莊又西有樓子莊皆閒以小水樓子莊與湯家泮一水相望而兩湖之頸也湖水沿東隄又北過稽家閘又北過荷花塘又西北過腰鋪又西北過露筋祠又北為三十里鋪入高郵界北湖小志

按原志湖澗於六湖五湖均備載惟考核不如甘棠小志之詳明故備錄之不嫌重複云 以上新增

河防志

運河卽今運道南自缺口門十里至灣頭一里至壁虎橋河東屬江都西屬甘泉河水中分為界自壁虎橋四里至瓦窰鋪高廟十五里至東西灣十里至邵伯驛十里至三溝十里至腰鋪十五里北至露筋廟交高郵州界共計八十里北承淮流西受高寶邵伯諸湖水轉導入江達海有隄有閘有引河有滾壩甘泉主簿專汛揚糧通判專管武職河營邵伯把總專汛江防河營守備分管甘泉縣知縣協同備防 府志縣案

運河卽邗溝也亦名官河西受七十二澗之水由甓

社等湖南至露筋為江都界由瓜儀二處入江又由邵伯芒稻河白塢河二處東南入江同上

江南之漕廣陵當其咽喉上江來者至自儀徵下江來者至自瓜洲會於楊子橋東北行過府城凡六十里而入邵伯湖又北行六十里入高郵界方輿紀要

邵伯越河越一作月在府城北四十五里明萬曆二十八年開雍正府志

時總河劉東星檄中河郎中顧雲鳳於運河東築越隄引河一道以避湖險同上

新越河在邵伯鎮南康熙三十九年開自倉巷口西向

折而南至大王廟築南北二壩北向置鍊犀一座鎮之

雍正縣志

邵伯向有更樓康熙三十八年六月湖水衝決其地水深四丈雖西岸另挑越河一道而決口湍激不能行舟

聖祖特命都御史壽蘊侍郎于成龍等南來同河臣張鵬翮即

時堵塞次年另開新越河并兩壩以奠民居濟漕運萬世

賴之行水金鑑參府縣志

人字河在府城北三十五里即邵伯金灣閘下之新河也水激分流象人字故名康熙三十八年重濬雍正府志

邵伯鎮南五里許曰金家灣水下大江最捷明萬曆間河臣奏發帑金三萬兩有奇募工挑濬自金家灣至運鹽河十六里入芒稻河閘又自芒稻河閘十八里入江

同上
國朝康熙三十八年

聖祖南巡至金家灣

諭河臣于成龍人字河有窄狹之處須相機挑挖於是請帑募工自邵伯鎮南自金家灣復自金家灣至運鹽河十六里入芒稻河閘又自芒稻河閘十八里入江一律重浚計二千二百九十三丈

同上

鳳凰橋引河在府城北三十里

雍正府志有縣志無

國朝康熙三十九年總河尚書張鵬翮以金家灣洩水

不暢奏請發帑復開此一河分殺其勢由芒稻河入

江計長一千四百九十二丈

同上

金灣三閘並滾壩之水十八里至人字河分小支由

蕭家口入艾陵湖正流十八里入芒稻河閘下江鳳

凰橋壁虎橋灣頭閘三支之水流至董家溝小支下

芒稻河正流三里會人字河水勢七分入芒稻河三

分由運鹽河東流經宜陵鎮抵泰州城又東流經江

堰鎮海安鎮由律法橋下海

河防志

邵伯湖在府城北四十五里東接艾陵湖西接白茆湖
南通新城湖北接甓社湖

雍正縣志

晉太元十一年謝安既築堰以灌民田民思其德比
於召公因名其埭與湖矣其後湖大浸爲民害唐興
元中李吉甫作隄以護又名之平津堰自是相繼修
築爲運河隄有斗門橋宋天聖七年發運使鍾離瑾
置閘通漕因遇官河之水淺涸則引以濟之嘉靖中
縣令張甯議曰邵伯湖乃上受諸湖之水而下流入
於江海其口闊二十丈發則橫溢爲害且邵伯一帶
與諸湖相連水若發則直衝隄岸宜於北自露筋廟

南抵馬家渡於舊隄之南別作一隄又自馬家渡南

至八塔鋪另築一隄成一夾河則河隄可保無事矣

方輿
紀要

運河東西隄在縣界者八十里西隄石工自露筋起至
三溝止長二千六百十五丈東隄石工自高郵交界起
至金灣三閘北頭止長五千一百九十七丈以下皆土
隄東岸至壁虎橋爲界鐵牛灣南壩馬家直東西灣有
柴埭險工西岸至缺口門爲界

河防志縣案合參

隄乃宋張綸所築天禧中綸爲江淮發運使因隋隄

增修甘泉縣志 卷之三
之舊增築之長二百里甘泉界內止八十里旁錮以巨石爲十
閘以洩橫流亦曰平水閘亦曰閘堰政和八年發運
使柳庭俊言真揚楚泗高郵運河隄岸舊有斗門水
牐等七十九座限則水勢常得其平比多損壞詔檢
討修復紹興五年詔浚瓜洲至淮口運河淺澀處自
是以時增治蓋自邵伯以北地勢西高東卑高寶諸
湖數百里受天長七十餘河之水夏秋泛溢其勢滔
天故隄堰爲最切也明永樂中平江伯陳瑄言湖漕
不隄與無漕同湖隄不牐與無隄同置閘之法欲密
欲狹密則水疏無漲滿之患狹則水緩無嚙決之虞

湖溢則洩以利隄湖落則閉以利漕又取湖之汚厚
湖之隄牐多則水易落而隄堅浚勤則湖易深而隄
厚庶湖漕不病而高寶以東亦不致有漂溺之患矣

方輿
紀要

邵伯埭在府城北四十五里一名邵伯堰今邵伯鎮雍正

縣志

邵伯鎮晉步邱也謝安鎮廣陵見步邱地勢西高東下
每春夏湖水漲輒東浸民田而西又苦旱爲築埭以界
之高下兩利民以比召伯甘棠名之曰邵伯埭河防志
寶公隄在邵伯鎮東南

續志考正又見水利隄壩內

隄建運河東隄腹內所以攔湖水便行人康熙三十

八年官隄決此隄亦決後為寶公寺僧募築故名縣志

志

露筋閘在露筋鎮跨運河

三溝閘在三溝跨運河

昭關滾水壩

舊有鰍魚壩圯康熙四十年改建於昭關

金灣三閘

金灣滾水壩

按金家灣東下芒稻河入江之路也以上俱河防志

高橋閘在府城北高橋運河口內通市河雍正十年新

建

黃金壩在府城北並雍正府志

柳青澗淺

東西灣淺各置涵洞二座

花家園淺

李家莊淺

姚家灣淺

吉祥莊淺

江家莊淺

按府城南北共十一淺其南新廟淺浪蕩淺頭潭淺宋家淺俱屬江都

明末漕規久廢閘不時閉沙不時疏洪澤湖底日高即分入運河者沙亦隨入運河日以淤淺為漕計者惟歲益增隄下河仰隄高與城等又前此諸塘既廢潦水別無所瀦伺間決防壑鄰時有揚州患伏於隱莫之有憂久矣 行水金鑑

國朝順治七八兩年奉

旨大挑運河

御史徐越有疏言何處當束之使狹何處當濬之使深何處當先施畚鍤何處當相度水平應直空者當計土以分方應水刷者應逼岸以瀹底 大學士王永吉論新河水勢三阻曰芒稻河閘新河之下口也兩閘六門共計十一丈則上口金灣閘當較闊兩倍今金灣上口三閘六門止八九丈是所入少而所出多此一阻也若於金灣閘南石工中間再開數口以洩湖水則此一阻可無慮矣自閘而下河路甚寬有二十丈者有十餘丈者惟孔家渡南約一二里許闊止五六丈水深止四五尺水小則涸此

又一阻也今若將淺狹之處一例挑深改闊如舊制俱闊十五丈則此一阻又可無慮矣新開月河水橋之南有兩舊河直對芒稻河東西兩閘之口所謂人字河也每年水發運河水至漫隄而此河有數箭之地深不過二三尺以至水勢東西分流不能直射閘口此又一阻也今若將此河挑深則水勢直注閘口下江此一阻又可無慮矣府志

康熙十三年總河王光裕將芒稻河原設二門閘西改為六門閘一座

康熙十七年總河靳輔築江都漕隄又大挑山清高寶

江五州縣運河

康熙十九年總河靳輔新建邵伯北滾水石壩一座其地

即鮑魚嘴 時寶高江三州縣 共建石壩八座

康熙二十三年總河靳輔挑邵伯南金灣閘入裏人字河再建金灣閘迤南滾水壩一座

康熙二十八年總河靳輔奉

上諭高郵州南北一帶殘缺甄石工程著修理

康熙三十七年總河于成龍奉

上諭運河東岸石工殘缺者仍補石工其土工隄內有水之處

亦着下埽幫築其減水壩俱着堵塞其越壩更屬緊要

亦着加幫防護又奉

上諭

人字河若有窄狹處可以相機挑挖凡有需水涵洞着令修砌令民灌田隄岸單薄處亦酌量加幫

康熙三十八年運河水決邵伯更樓

特命尚書張鵬翮總督河道

親授方畧以行

康熙三十九年邵伯更樓決口塞總河張鵬翮遵

旨重濬

人字河計二千二百九十三丈又以金灣洩水不暢奏請發帑開鳳凰橋引河以殺水勢計一千四百九十二丈

河防雜說曰邵伯湖緊貼運河惟恃西岸石隄障禦風浪然後糧艘得以通行無礙至於東岸長隄則不特為江南浙閩三省驛路即運河之水亦必賴以攔束否則立刻東瀉河成陸地不可行舟矣但運河地勢甚窪較之高家堰外洪澤湖底更低丈餘方高堰隄外之水深至一丈二三尺之時其水面比高寶諸湖之底約高二丈四五尺而高寶諸湖西岸石隄其高不過丈餘是以上流隄堰一有疏失其水不過一二日間即從高寶諸湖西岸隄頂平漫而過西隄過水則東隄亦不能支東隄一開則西隄石工雖堅而

尾土先被洗去未有不隨之以傾者兩隄俱決則大溜橫沖河身跌深堵塞最難矣今高堰一帶雖有減水壩六座共寬一百七十丈二尺以減淮漲然必淮流高過壩底方始減下其間宣洩有節不似決口之水徹底奔騰無窮無盡者比也第上流既有此減下之水歸入高寶諸湖若不導之出路則逐漸擁高亦必漫過西隄終成決口况高寶諸湖除受堰隄各壩減洩之水更有天長盱眙等縣各山澗之水亦復不小今於寶高江三州縣東隄上除向來原有減水閘壩涵洞之外又增建改建減水壩共八座計其洩水

之地共長一百八十九丈二尺是三州縣減壩比堰隄減壩加長十九丈凡向來原有之閘壩涵洞以之抵洩運河下注并天盱等處山澗歸湖之水其新建減壩一百八十九丈二尺以之抵洩堰隄一百七十丈二尺減下之水如此則因入爲出宣洩有序是以康熙二十二年夏秋之間雖湖河漲極而不致壅積傷隄也

行水金鑑

康熙四十四年總河張鵬翮題請佑修高寶江運河東西隄卑薄埽土工

江都之金灣三閘鳳凰橋人字河等處引河在在淤

淺而奸民攔河築壩阻塞下流是以有此題請并定
每年十二月十五日閉壩正月十五日開壩用河兵
分段挑空歲以為常 河防志

運河西岸自淮安至揚州宜多建進水閘壩引湖水
入運河濟運若運河水大又宜於東岸多設減水壩
閘放運河之水由各支河入海引湖水入河濟運則
河水不患其少放河水由支河入海則河水又不患
其多真萬全之策也 居濟一得

乾隆二年奉

旨大挑淮揚運河 縣案 以上原志

按河防水利軍政三者前志所輯因時更易河防
有險易水利有通塞軍政有閒劇不專泥于古也
今特以其為宋明舊制之僅存者檢維揚志錄入
以無忘沿流所自焉

邵伯上下閘 洪武初建

邵伯小壩 在邵伯下開口西岸洪武七年壩官成景仁建

府城南北舊有十一淺其四屬江都七係甘境前志備
載其名每淺正房三間火房二間牌樓一座井亭一
座什物三十六件老人一名塘長一名夫四十名歲
辦椿木四十根草四萬束樹多寡不一

甘邑之有運河介在高郵江都上下間才四十七里耳糧艘所往來若浮送鹽舟則出自六開口經行不及其半然外連邵伯諸湖一綫之防爲下流數州縣田廬所係非獨邑境東南之利害也自五壩建瓴而下諸湖旣不能受欲恃區區之隄障烏可得哉河防設有專官蓄洩疏導數十年來益以周密非復如前志之舊荷花塘決口連歲未定耗費滋甚所以爲閭閻計者上下咸殫心竭蹶庶有瘳乎其工有石有甃有土有柴其制有橋有閘有壩因時更易隨勢緩急運河東西兩隄自北而南

以次順敘而西隄較短其工段丈尺之煩不能瑣列東隄下入江諸水俱屬江都境首尾銜接一氣承引畫疆而理不備述焉

運河東隄

高郵汎交界至露筋鎮石工乾隆二十二年加高

居家田頭至露筋閘石工用土加高

露筋攔河大閘乾隆二年拆除築土

露筋至金家田頭石工用土加高

金家田頭柴工

魏家田頭柴工

夏家直柴工康熙三十五年建

周家門首柴工乾隆十五年建

大營盤乾隆十五年建

崇家灣柴工久廢停修嘉慶十一年五月漫溢堵築

仲家莊柴壩乾隆五十二年漫溢堵築

北顧家溝柴工

涵子口柴工乾隆二十六年漫溢建築

四堡壩工乾隆五十二年漫溢堵築

腰鋪石工乾隆二十六年漫溢堵築

孫家門首石工用土加高

馮家田頭石工用土加高

蔡家潭柴工久廢停修續被水衝乾隆五十八年補廂

嘉慶十三年漫溢堵築

周家溝柴工乾隆八年建

大潭灣取直土工乾隆八年建

荷花塘柴壩工乾隆二十六年漫溢堵築嘉慶十一年

五月又漫溢堵築十三年又漫溢修築 裏口越隄

乾隆二十六年並漫溢堵築五十二年漫溢坍塌缺嘉

慶十一年漫溢補還越隄十三年復漫缺堵築

周家溝柴壩工乾隆五十二年漫溢堵築

竹林寺南石工用土加高

三溝閘舊建攔河大閘乾隆六年拆除改築柴工

宋家淺迎湖石工乾隆五年建用土加高

昭關石滾壩北牆舊建石工乾隆五年用甄加高復用

土加

昭關石滾壩乾隆二十二年建二十六年加高壩脊以
運河水長至一丈四尺開壩嘉慶十二年定以一丈
六尺七寸開放十三年奉飭開放壩底衝損用柴圈
堵壩外木橋一座壩下引河接入恆子河由淶洋
河至興化縣境出丁溪小海等閘入海

昭關石滾壩南牆舊建石工乾隆五年用甄加高復用

土加

稽家閘柴工廢

稽家閘南至鰍魚嘴舊石工雍正五年改修甄工復用

土加高

鰍魚嘴柴工康熙三十五年建

鰍魚嘴工南起至舊昭關壩舊建石工康熙四十五年

加長甄工後俱用土加高

昭關壩柴工乾隆七年建久廢

昭關壩工起至減水三閘甄石工康熙三十八年雍正

五年乾隆五年先後修建後俱加土

減水三閘康熙三十八年建宣泄邵伯湖水由恆子河
匯歸淶洋河乾隆二十三年拆造改寬設板啟閉今
堵塞

閘南牆起至二閘柴壩內石工建自雍正五年乾隆五
年加甃後復加土

減水二閘柴工乾隆十八年建

柴工南起石工舊建乾隆五年加甃復加土工

石工至邵伯鎮奶奶廟石馬頭甃工乾隆五年建後加
工

石馬頭起至廟巷口石工康熙五十三年建乾隆八年

加石

邵伯鐵牛前柴工康熙三十八年建

晏公廟起至南壩北甃工乾隆五年建後用土加高

南壩外口柴工康熙三十八年建停修裏口柴工久
廢

南壩起至黑魚塘甃工乾隆五年建後用土加高

黑魚塘石工舊建用土加高

黑魚塘柴壩工乾隆五十二年漫溢堵築

馬家直隄柴工雍正十三年建久廢

金灣三閘舊建乾隆八年拆造北閘雙門落低底石一尺二寸二十三年復行拆造落低底石二尺四寸以便鹽漕運行其南閘二門于乾隆二十七年改建石滾壩展寬金門壩下引河至仙女廟下八港口入江新滾壩設木橋一座

新石滾壩起至南三合土舊滾壩石工乾隆二十七年建舊滾壩建自康熙二十五年乾隆二十五年將壩底展開甄裹兩牆下開引河由朱公橋韓家灣亦出八港口入江二十七年壩河加挑寬深亦設木橋一座

東西灣柴工二段今廢

東西灣三合土滾壩一座乾隆十年建二十三年東灣改寬壩門落矮壩脊外設木橋二十七年西灣改低壩底挑深壩下引河外亦設木橋壩下引河匯達江都灣頭閘內鹽運河穿南岸石羊溝經喬子溝河出舊沙河港入江乾隆八年開挑二十一年復大挑至嘉慶十二年又加挑寬深

八塔鋪挑水壩八座乾隆六十年築

鳳凰北木橋乾隆四十四年加甄裹頭甄橋係舊建南木橋亦以乾隆四十四年裹甄橋下引河亦出舊沙

河港入江

壁虎北木橋乾隆二十三年建四十四年加甃裏頭中木橋乾隆四年建復于四十四年裏甃其甃石橋係舊建俱宣泄邵伯湖水由江都灣頭鹽運河歸江

運河西隄

小河口柴埧

黃泥港柴埧二港遇湖水長發即開放宣泄入河濟運乾隆二十六年堅閉

露筋閘至大潭灣臨湖石工舊建

仲家莊對過柴埧乾隆五十二年漫溢堵築

崇家灣西岸迎湖柴工嘉慶十一年漫溢堵築

四堡對過柴埧乾隆五十二年漫溢堵築嘉慶十一年漫溢漂散

貧家營柴工康熙三十五年建嘉慶十一年五月漫溢堵築十三年又築

荷花塘排椿埧柴工乾隆二十六年建五十二年漫溢改築嘉慶十一年五月漫溢西岸迎湖還築圈越十一年又溢外越接築

臨運取直緯送柴工乾隆二十六年漫溢堵築嘉慶十一年五月漫溢漂散

增修甘泉縣志 卷之三
大潭灣取直甑石工乾隆十九年創築二十六年暴風
衝潰明年估圈加築排樁夾堤嘉慶十一年五月荷
花塘漫溢衝散

大潭灣南至三溝開臨湖石工舊建開外通湖港一道
鰍口港河遶隱棠橋七截橋至梁家港入運河乾隆四
年挑浚便利行舟

金灣六閘對岸越河繞越金灣閘堤東西灣滾堤至八
塔鋪入運河乾隆八年開挑寬深嘉慶十一年鹽務
挑濬支河開放閘堤行船無掣溜之虞

寶公隄在邵伯鎮東南運河東隄腹內前志云攔湖水

便行人者累經修築其內卽所稱南塘也近年水盛
漲隄石傾卸浸以危險嘉慶十一年里紳吳堯夫徐
元忠丁立人齊述初趙溶川等公議修築寬三丈高
一丈長一百五丈踰舊制三倍有奇捐銀三千四百
餘兩檢討薛鳳翔有重修南隄記

玉帶河未見前志西連南塘東通下河艾陵諸湖年久
淤墊嘉慶九年河水漲溢荷花塘工廠搶險取土甚
艱鎮中紳士徐元惠趙洵丁二陽蔣和等公捐挑濬
卽以土供搶險之用湖路亦通利

以上續志
修防駐邵伯鎮者江運廳同知江防營守備甘江汛主

簿把總協防下汛協防

江運同知駐邵伯東街初駐邵伯者爲揚糧通判兼理監兌漕糧事宜道光二十年以監兌事宜歸揚州府清軍同知管理改稱揚糧通判爲揚運通判專司河務道光二十九年裁揚運通判歸併江防同知改稱江防同知爲江運同知仍駐邵伯主簿舊駐邵伯大街把總駐蔡家巷守備及兩協防僦居邵伯民房協防先止一員道光八年增設下汛協防一員

江運同知統於常鎮通海兵備道轄甘江汛暨京口汛今改歸揚州府同知江運缺裁

江運廳所轄河道各工上接揚河廳交界起下至瓜洲江口止運河共長一萬八千八百五十四丈四尺計程一百四里三分零東岸隄工共長一萬一千六百七十八丈四尺西岸隄工自露筋起至三溝閘止工長三千三百二十四丈

甘江汛主簿把總兩協防所司河道

甘江汛員弁分管河道北自揚河廳交界起南至灣頭閘止隄長八千五百零八丈四尺計程四十七里零隄寬一丈五六尺至二三四丈不等運河長八千五百七十七丈河面寬七八丈至十餘丈不等內東岸

土隄連各閘埧口門共長四千八百丈零六尺輒工
閒段共長九百六十三丈八尺石工閒段共長七百
十七丈埧埧各工連緯道共長二千零二十七丈又
金灣閘入裏撐隄一道計長三百八十丈內隄頭龍
尾埧長一百十二丈

邵伯鎮北東岸有崇家灣工蔡家潭工荷花塘工

崇家灣工嘉慶十一年漫溢堵築工長一百五十四
丈蔡家潭工嘉慶十三年漫溢改於裏首堵築工長
一百四十四丈五尺至二十年補還臨運取直緯隄
工長一百三十六丈其裏首堵築之工淤閉荷花塘

工嘉慶十三年漫溢改於裏首堵築埧工長四百九
十六丈至十八年補還正埧工長五十二丈裏首圈
越埧工久經淤閉

西岸有土工有迎湖石工有崇家灣工瓮家營工荷花
塘工

西岸土工長五百五十九丈內北極宮北首迎溜土
隄於道光十一年包砌碎石工長三十二丈五尺又
貞應祠後身於道光十五年圈築越隄工長九十二
丈迎湖石工自北極宮起至三溝閘止閒段共長二
千一百八十三丈道光九年停修頭二淺塘越灣石

工三百四十丈於裏首取直包砌碎石工長一百九十丈十年又於小五堡對過並二淺小塘二處改拋碎石工長一百零二丈十一年又於腰鋪營房對過拋砌碎石工二段長五十五丈現在實存石工長一千六百八十六丈於道光三十年改包碎石又自通湖港南起至梁家港止接築土工長一千七百八十八丈崇家灣西岸嘉慶十一年堵築柴工道光元年復包碎石工長六十六丈瓮家營嘉慶十三年堵築柴工二十二年復包碎石工長一百七十三丈荷花塘西岸嘉慶十一十三兩年堵築柴工二十二年復

包碎石工長三百二十一丈自頭淺塘起至荷花塘止共長一千三百二十八丈

分洩湖水港口黃泥港口通湖港石閘通湖港口鰍魚港口菜花港口奶奶廟港口陳家港口木排港口紅橋港口小石橋港口鐵牛港口梁家港口母家港口黃泥港口寬十丈長一百二十丈通湖港石閘金門寬七丈兩牆建砌八角裏頭各周長八丈計十一層道光十四年成通湖港口寬十丈長五百十丈鰍魚

增修夏縣志 卷之三
港口寬十丈長十丈菜家港口寬六丈長八十丈奶
奶廟港口寬六丈長一百十丈陳家港口寬六丈長
一百二十丈木排港口寬十丈長七十八丈紅橋港
口寬三丈長八十五丈小石橋港口寬一丈五尺長
七十五丈鐵牛港口寬四丈長九十五丈梁家港口
寬十二丈長二百七十四丈母家港口寬四丈長一
百四十丈

東岸分洩運河之水歸海歸江諸口在鎮北者曰昭關
有滾坝有耳閘在鎮南者曰金灣有北閘有中間有新
坝有舊坝曰東西灣有東灣坝有西灣坝曰鳳凰橋有

木橋曰瓦窰鋪有新河曰壁虎橋有北木橋有中木橋
有甄橋曰灣頭有閘

昭關滾坝一座金門寬二十四丈南北兩裏頭各長
十一丈計石十一層坝下引河長四百六十三丈乾
隆二十二年造嘉慶十三二十四及道光二年啟放
冲損道光三年修復四年冬埝盱大隄漫缺湖水驟
注啟放冲損用料堵閉復於六年啟放宣洩堵築埽
戩移坝於北首三元宮南金門丈尺照舊石牆加高
三層道光十年工竣

昭關坝南耳閘一座金門寬一丈二尺道光十一年

造

按此下舊有減水三閘金門寬八尺久經堵塞

昭關堤舊在鎮北五里與高郵州南關大堤南關新堤五里

中堤車邏大堤為運河五堤與高堰仁義禮智信五

堤較準尺寸相為表裏按南河成案乾隆二十二年

大學士公傅恒奏請於昭關地方復設滾堤滾堤之

下開一支河更將南關舊堤改建滾水石堤便與高

堰五堤相應續南河成案道光八年英和等奏揚糧

廳昭關堤四年六年洩放洪湖漲水堤底損壞跌塘

甚深臣與蔣攸銛悉心籌議一面咨會河臣張井等

再行詳慎查覆旋准張井等以勘得昭關堤舊基跌

塘極深實不能修復請於舊堤之北三元宮之南刷

隄移建該處土性堅凝洩水形勢甚便且下有舊通

苻絲湖河形即可就作引河等因咨覆前來臣查既

據河臣確勘應即照辦但此項堤工與林家西所建

石堤相為表裏均係備豫不虞一經洩放湖水建飯

而下於下游地畝總不免有被淹之處應令河臣嚴

飭廳員平時堅守倘遇異常盛漲萬分喫重廳員會

同州縣相度機宜方准啟放非此則斷不准率行宣

洩違者嚴參治罪所有移建昭關堤連築柴堤其估

增修長興縣志 卷之三
銀九萬兩嗣於九年完工金門仍寬二十四丈上迎水各橫長三丈由身直長五丈下分水各斜長三丈兩牆各長十一丈計石十四層填脊高河底一丈一尺九寸石牆海漫高填脊一丈一尺一寸揚糧通判孫國壽承修此昭關建堤之始及新堤移建地址丈尺也至啟放之制高郵境內四堤皆有定則昭關堤獨無今以歷年啟放昭關時三溝閘誌椿水深丈尺考之嘉慶二十四年啟放係九月初十日是日誌椿水深一丈九尺三寸道光二年啟放係八月十三日是日誌椿水深一丈九尺道光六年六月三十日三

溝閘誌椿水深一丈八尺參將張兆赴昭關堤啟放嘗奉

旨詰問此皆昭關堤未移三元宮以前事也自道光九年移建後復於道光十二年八月初一日啟放是日誌椿水深二丈零五寸二十八年七月二十五日啟放是日誌椿水深二丈二尺四寸大約非在二丈以外不輕議啟也

金灣北閘一座計二門每門各寬二丈二尺閘下引河長三千八百丈洩邵伯諸湖之水由人字河芒稻河歸江

增修甘泉縣志 卷之三
金灣中開一座計二門每門各寬一丈六尺閘下引河長八十丈水匯入北閘引河歸江

按人字河頭至芒稻閘引河長四百七十五丈分洩金灣來水入芒稻閘下引河歸江又褚家山埧一道計長十二丈洩水入人字河匯入芒稻閘下

引河歸江

金灣新埧一座口門寬三十丈外建木橋橋下引河長四百丈水匯入北閘引河歸江
金灣舊埧一座口門寬五十丈外建木橋橋下引河長二千六百五十三丈洩邵伯諸湖之水入董家

溝歸江

東灣埧一座口門寬三十六丈外建木橋橋下引河長二千六百三十五丈洩邵伯諸湖之水匯入石羊溝沙河港歸江

西灣埧一座口門寬二十四丈外建木橋橋下引河長四百四十丈洩水匯入東灣埧引河歸江

鳳凰橋一座原建北橋口寬十丈南橋口寬十二丈磚橋橋身連兩裏頭計長十四丈口寬一丈二尺道光十一年拆除磚橋又南首土隄被溜冲刷深塘長七丈現在口門共長四十三丈外建木橋橋下引河

增修甘泉縣志 卷之三
長一千五百八十四丈上洩邵伯諸湖之水匯入董家溝石羊溝歸江

瓦窰鋪池北道光八年增挑新河口門寬四十丈外建木橋橋下引河長一千三百三十九丈五尺洩邵伯諸湖之水入廖家溝歸江

壁虎北木橋一座口門寬二十丈道光十年展寬十丈共寬三十丈外建木橋橋下引河長八十六丈洩邵伯諸湖之水匯入灣頭閘下引河出廖家溝歸江
壁虎中木橋一座口門寬十丈外建木橋洩水匯入磚橋引河歸江

壁虎磚橋一座計二門每門各寬一丈橋下引河長一百五十二丈洩邵伯諸湖之水匯入灣頭閘引河出廖家溝歸江

灣頭閘一座金門寬二丈四尺洩邵伯諸湖之水由廖家溝歸江

按閘下舊鹽河至芒稻閘止計長一千六百二十四丈兩岸皆高阜民田無隄工

揚州水道記言金灣以下橋埧開放之制道光十二年張井奏三溝閘誌椿長至九尺以外不論何時卽將歸江之金灣以下各橋埧相度機宜次第啟放以

期暢達歸江按此奏盛稱越河之利非謂橋埧開放定制如此也橋埧開放自有節次是年運司會同淮揚常鎮二道議以三溝閘誌椿爲上游存水之則在下游則有長生庵誌椿爲憑其閒消長各有不同若啟放歸江各埧必須將兩處誌椿及揚州城河水勢三面較量以定蓄洩方無顧彼失此之虞酌中定議以三溝閘誌椿存水九尺爲度如存水一丈酌啟金灣舊埧東西灣埧一丈一尺添啟鳳凰橋瓦窰鋪埧一丈二尺添啟人字河褚家山埧仍隨時察看長生庵誌椿並揚州城河水勢以及來源之旺衰江汛之

大小臨期妥爲斟酌稟請啟閉總使揚州城河存水常在五尺以上云云蓋金灣舊埧以下各橋埧下游雖地址高爽入江路暢不致如昭關埧啟放有礙下河田廬然鹽運漕艘均須節宣有制故必以揚州城河水存五尺以上爲準也惟金灣北閘灣頭閘鹽艘利涉故有啟無閉以爲常

堡夫汛兵採草積土

甘江汛建設堡房二十七座額設夫五十四名歲積土二千一百八十方遇閘加積原設河兵九十八名內除裁撥三十七名實存汛兵六十一名建設兵堡

房十二座每年冬採額草一萬束額柳三千束積土
五百七十方
道光三十年自通湖港南至梁家港接築西岸土工
長一千七百八十八丈以禦盛漲時西風巨浪按明
江都令張甯言昔論漕河之險者先高寶次邵伯而
今之水大者莫如邵伯最難守者亦莫如邵伯蓋高
寶昔固稱險障之則有西隄而內河成則湖分於外
人由夾河中行不知有湖矣今邵伯一帶隄與水鄰
絕無外障以故水乘風勢摧隄若蹴垤因建二策其
一曰障之便北自露筋南抵馬家渡舊隄以東另築

一隄此以舊東隄為西又自馬家渡而南至八塔鋪
隄另築一東隄也
舊隄以西另築一隄此仍以舊隄為東各接舊隄中
隄另築一西隄也
作二閘成一夾河并如高寶之制費不過六七萬金
而湖隄可保無事議不果行

國朝乾隆間李奉翰以運河東岸隄工卑薄邵伯一帶民
居稠密風浪堪虞請於三溝閘池下添築西隄十五
里使東隄有所攬護經阿文成公奏停又不果行至
道光庚戌議始定夫湖風浩浩萬頃西來不得以有
此重城為無益也但高不及東隄猶虞盛漲漫越又
必創築堅厚始不致斃甘棠傾圮耳小志

龍王廟東廂牆工長十丈廟東牆無頂東坡殘缺做成新頂寬一丈

崇家灣福神祠南首窳潮工長二十四丈做成頂寬八尺五寸

小六堡北垣頭北首窄狹工長四十一丈做成新舊隄頂寬二丈正垣接下工長八十一丈八尺做成隄頂高二丈五寸寬四丈五尺迤南窄狹卑矮單薄至七堡止工長二百一十八丈五尺做成新舊頂共寬八丈九堡脫坡工長十三丈做成新頂寬三丈迤下窳潮工長二十四丈寬高與九堡同

四棚灣脫坡工長二十五丈做成上長新舊頂寬三丈六尺下長三丈九尺又接下脫坡迤下窳潮工長五十五丈做成新舊隄頂寬七丈六尺

竹林寺迤南工長二十丈做成新頂寬一丈二尺

奶奶廟馬頭北首起滲水工長三十丈做成頂長三丈海漫石外新頂寬三丈

夏家南廂馬頭石高新頂四尺五寸後簷新頂寬一丈蔡家巷北首卑矮窄狹工長九丈做成新頂寬三丈五尺又南首窳潮迤下滲水工長三十三丈做成頂高五尺五寸寬二丈新舊隄頂寬四丈

城隍廟馬頭南首窰潮接下工長二十五丈五尺做成新頂寬八丈

灰馬頭滲水舊工長二十八丈做成新頂寬八丈

李家巷卑矮工長三十四丈做成新頂寬一丈二尺

小六堡起至黑魚塘止東隄西坡浪撞殘缺填補水溝浪窩共長六百零三丈

大王廟迤南窄狹工長五丈五尺做成新舊頂寬二丈

金灣入裏窰潮工長八丈做成新舊頂寬一丈二尺二

間南首皸裂十四段磚工共長五十五丈二尺填補尾眉土工寬十二丈六尺自三溝間南計四十三段脫落

海漫石填補磚工腰洞工長共一百七十七丈三尺

以上同治七年修

小六堡正堤埽工上中下共長八十五丈做成隄高埽眉一丈零五寸

二間工長四十六丈做成隄高埽眉二尺五寸

馬家直工長二百五十丈做成隄高埽眉二尺五寸埽

擋土工上長一百二十五丈新舊土工頂寬三丈隄高埽眉五尺

以上同治八年修

小六堡西隄工程自露筋祠起至越堤北堤頭止工長

一千三百六十餘丈越堤缺口自北堤頭至南堤頭止
長二百四十餘丈兩工共長一千六百餘丈做成頂寬
一丈八尺

以上同治九年修

金灣舊堤南首高家塢三段工長一百七十七丈做成
新舊頂寬三丈

馬家直工長七十丈做成隄高埽眉三尺填補尾眉土
寬三尺高七尺三寸又因馬家直窄狹計五段工長共
二百三十三丈做成隄頂共寬十五丈

黑魚塘計四段塌卸隙裂石工長四十五丈填補共寬

三丈二尺高三丈二尺又黑魚塘石工長二十九丈填
補尾工寬一丈高一丈三尺五寸

鐵牛灣埽工長二十三丈填土心長十九丈五尺寬二
丈高二丈

以上光緒元年修

鐵牛灣南首兩頭隙裂中間塌卸面石工長十四丈八
尺磚工長二百六十六丈四尺添新面石工長四丈四
尺四寸新面磚工長一百零六丈五尺六寸填補尾眉
共寬十九丈

荷花塘工長七丈四尺寬五尺高一丈六尺六寸

城隍廟巷裂臆欹斜面石九十五丈九尺七寸添新面石工長三十八丈三尺八寸

小二閘池北三處臆裂塌卸五丈九尺加築眉土寬一丈三尺高一尺

小三閘南首臆裂塌卸兩處共長十二丈又北首長十丈做成與南首海漫石相平眉土高海漫石一尺三寸馬家直土埽工長四十丈做成新項寬八丈六尺又接下長五十五丈六尺做成隄高埽眉三尺高舊隄項五尺六寸寬三尺

黑魚塘工長五十四丈做成隄項寬一丈八尺五寸

大王廟南首長二十三丈做成隄項寬二丈一尺

邵伯鎮南廠接下工長一百零一丈六尺做成新項寬一丈四尺

以上光緒四年修

鰍魚港對河工長四十五丈八尺做成新舊坡仍存舊隄項寬一丈四尺二閘池下至小三閘南牆止工長一百五十三丈做成高海漫石五寸

古昭關埧工長一百六十七丈三尺做成新項寬二丈一尺高海漫石二丈一尺五寸

昭關埧耳閘池北工長一百五十九丈做成新項寬十

四丈
 荷花塘正埧工長五十一丈做成新頂寬三丈高二尺
 崇家灣工長八丈做成隄高二丈五尺新頂寬一丈
 夏家直長十六丈高寬與上同
 金灣入裏工長二十五丈隄頂窄狹南坡脫卸做成新
 頂寬一丈
 黑魚塘塌卸石工長二十四丈填補尾土寬三丈高四
 丈六尺四寸
 鐵牛灣稅房門首及磨盤埽工長三十五丈填補土心
 並眉埽工長三十五丈高四丈一尺一寸

南大王廟西廂起至南廠池北止磚工五十三處脫卸
 腰洞磚工長七丈五尺填補尾眉土寬八尺高一丈一
 尺四寸
 上馬頭南首脫卸腰洞十四處長四丈
 李家巷南脫卸磚工長一丈二尺填補尾眉土寬十丈
 高二丈一尺
 李家巷腰洞磚工六丈鐵牛灣磚工脫卸腰洞十七處
 廟巷口南磚工脫卸長三丈填補寬二丈二尺高一丈
 八尺
 大馬頭至城隍廟北首脫卸腰洞十八處中州會館南

至二閘脫卸腰洞七十二處二閘往北腰洞脫卸五十
四處鰍魚嘴脫卸腰洞四十二處耳閘南至三溝閘脫
卸腰洞十處做成修補磚工與上下舊工一律
高家塢西坡西廂牆工長一百七十六丈做成新頂寬
三丈高四尺五寸

福神廟神座前向西工長四十三丈八尺做成新頂寬
二丈三尺

馬家直土埽工長七十丈做成新頂寬三丈一尺高禦
誌樁河水二丈四尺六寸
黑魚塘工長十丈零五尺做成新埽眉寬一丈高海漫

石五寸

陳家跳工長三十丈做成新頂寬三丈

泰山宮南首工長二十四丈做成新頂寬三丈高海漫
石一尺八寸

以上光緒五年修
河務總局案
以上新增

